

XIII. IGANDEA URTEAN ZEHAR (A)

Otoitza

Jainko Jauna,
zure seme-alabatzat hartuz, argiaren seme-alaba egin gaituzu;
iguzu, ez gaitzala inguratu gezurraren ilunbeak,
eta zure egiaren argi ederrean bizi gaitezela beti.
Zure Seme Jesu Kristo.

I. IRAKURGAIA: 2 Erg 4, 8-11. 14-16a

*Jaungoikoaren gizon hori santu bat da;
gurean geldi dadila.*

Erregeen liburutik

Behin batean, Eliseo Sunandik barrena igarotzen zelarik, hango andre aberats batek bazkaltzera eramane zuen; eta geroztik Eliseo, handik igarotzen zen guztitan, harengana joaten zen bazkaltzera. Andreak honela esan zion senarrari: «Begira, badakit Jaungoikoaren gizon hori santu bat dela. Egin diezaiogun etxe gainean gela txiki bat, sarritan baitator gurera; jar diezazkiogun han ohe, mahai, aulki eta argimutil bat, gurera datorkenean bertan geldi dadin».

Halako batean, etorri zen Eliseo, gela hartan sartu eta bertan etzan zen. Eliseok Gejazi bere morroiari esan zion: «Zer egin dezakegu andre honen alde?» Gejazik erantzun zion: «Ez du haurrik, eta bere senarra zaharra da». Eliseok Gejaziri: «Dei egiozu».

Dei egin zion Gejazik, eta atean agertu zen andrea. Eliseok esan zion: «Datorren urtean, garai honetan, seme bat izango duzu besoetan».

ERANTZUN SALMOA: Sal 88, 2-3. 16-17. 18-19

**R/. Jauna, zure maitasuna abestuko dut
betiren beti.**

Jauna, zure maitasuna abestuko dut betiren beti,
zure leialtasuna adieraziko gizaldiz gizaldi.
Esana baituzu: «Maitasuna betiko dut eraiki»,
zeure leialtasuna zeruan duzu sendoarazi. R/.

Bai dohatsu, Zuri pozez oihu egiten dakien herria:
Jauna, zure aurpegiko argian dabila.
Zure izenaz dira beti pozten,
zure zuzentasunaz harrotzen. R/.

Zu baitzara haren indarraren dedua,
eta zure onginahiz jasotzen dugu burua.
Jauna da gure babeskia, izan ere,
Israelgo Santua, gure Errege. R/.

II. IRAKURGAIA: Erm 6, 3-4. 8-11

*Bataioaren bitartez Berarekin heriotzan hobiratuak izan gara,
biziera berri batean ibil gaitezen.*

San Paulo Apostoluak Erromatarrei

Senideok: Bataioaz Kristo Jesusi lotuak izan garenok, Haren heriotzari lotuak izan gara. Bataioaren bitartez Berarekin heriotzan hobiratuak izan gara; Kristo hilen artetik Aitaren aintzaz biztua izan zen bezala, gu ere biziera berri batean ibil gaitezen.

Beraz, gu Kristorekin hil bagara, sinesten dugu, bizi ere Berarekin biziko garela; izan ere, badakigu Kristo hilen artetik biztu zenez gero, ez dela berriro hilko; heriotzak ez du Harengan gehiago aginterik. Haren hiltzea, bekatuarentzat behin betiko hiltzea izan baitzen; eta Haren bizitza, Jaungoikoarentzat bizitza da. Horrela, bada, zuek ere eduki itzazue zeuen buruak bekatuarentzat hilak bezala eta Jaungoikaarentzat biziak, Kristo Jesus gure Jaunarengan.

EBANJELIOA: Mt 10, 37-42

Aleluia: Ik. 1 Pe 2, 9

R/. Aleluia.

V/. Zuek jatorri hautatua zarete,
erre apaizgo, enda santu;
oihuka itzazue, ilunbetatik atera
eta argi zoragarrira dei egin dizuenaren
egintza harrigarriak. R/.

*Bere gurutzea hartzen ez duena, ez da Niretzat gai.
Zuek hartzen zaituztenak, Ni hartzen nau.*

Jesu Kristoren Ebanjelioa San Mateoren liburutik

Aldi hartan, Jsusek honela esan zien bere apostoluei: «Aita eta ama Ni baino maiteago dituenak, ez da Niretzat gai; semea edota alaba, Ni baino maiteago dituenak, ez da Niretzat gai; eta bere gurutzea hartu eta Nirekin ez datorrena, ez da Niretzat gai. Bere bizia beretzat gordetzen duenak, galdu egingo du; eta bere bizia Niregatik galtzen duenak, beretzat gordeko du.

Zuek hartzen zaituztenak, Ni hartzen nau; eta Ni hartzen nauenak, Ni bidali nauena hartzen du. Profeta bat, profeta delako, hartzen duenak, profeta saria izango du; eta zintzo bat, zintzo delako, hartzen duenak, zintzo saria izango du.

Nire ikasle delako, txiki hauetako bati baso bat ur hotz edateko ematen dionak, benetan diotsuet, ez du galduko bere saria».

Oparigaien gainekoa

Jauna, Zuk ematen diezu sakramentuei bere indarra;
Iguzu, gure zebitzuak gai egin gaitzala
zure dohain santuak hartzeko.
Jesu Kristo.

Jaunartze ondorengo

Eskaini eta hartu dugun opariak
eman diezagula bizia, Jauna:
maitasunean beti Zurekin bat eginik,
fruitu iraunkorrak ekar ditzagun.
Jesu Kristo.